

- राज्य मंत्रिमंडल राजस्थान जन विश्वास अध्यादेश ने मंजूरी दीनी- राजस्थान ट्रेड प्रमोशन नीति समेत प्रदेश री केई नीतियां ई मंजूर कीनीं
- संचार मंत्री ज्योतिरादित्य सिंधिया कह्यो - संचार साथी ऐप रे जरिये जासूसी नी करी जा सके हैं
- केंद्रीय संस्कृति अर पर्यटन मंत्री गजेन्द्र सिंह शेखावत सैर-सपाटा ऊँ जुड़्या कारोबारियां ने भारत री सकारात्मक तस्वीर दुनिया सामी लावण बाबत् कह्यो
- अन्तर्राष्ट्रीय दिव्यांगजन दिवस रे मौके मुख्यमंत्री भजन लाल शर्मा दिव्यांगजन ने समाज री अनमोल निधि बतायां

000

श्री पटेल बतायो के कैबिनेट किशनगढ़ ने जयपुर रा वैकल्पिक हवाई अड्डा रा तौर ऊँ विकसित करण सारू 15 एकड़ जमीं मुफ्त देवण रो फ़ैसलो कीनीं वे बतायो के सरकारी नौकरियां मांय वेटिंग लिस्ट री वैधता री मियाद 6 महीना ऊँ बधा र एक साल करण रो फ़ैसलो करी ज्यो हैं ई सागे ई कैबिनेट अनुकंपा नियुक्ति रा मामला मांय मरण वाळा कर्मचारी रा पिरवार वाळां कानी ऊँ 90 दिन री बजाए 180 दिन ताई अर्जी देवण ने ई मंजूरी दीनीं

000

संचार मंत्री ज्योतिरादित्य सिंधिया संचार साथी ऐप रे जरिये जासूसी करण रा विपख रा आरोप खारिज कर दीना हैं आज लोकसभा मांय वे साफ़ कीनीं के इण ने काम लेवण वाळा वां री मर्जी रे मुताबिक पंजीकरण करा र ऐप काम ले सके हैं सिंधिया कह्यो के देश मांय मोबाईल फोन काम लेवण वाळां री तादाद एक अरब है अर वां ने साइबर धोखाधड़ी ऊँ बचावण सारू संचार साथी पोर्टल अर संचार साथी ऐप री सरुआत करी ज्यी हैं

000

सूचना अर प्रसारण मंत्री अश्विनी वैष्णव कह्यो है के झूठी खबरां लोकतंत्र सारू खतरो हैं आज लोकसभा मांय प्रश्नकाल रे दौरान पूरक सवालां रा जवाब मांय वैष्णव कह्यो के ए.आई. ऊँ बणायी ज्या डीप फेक री पिछाण कर र वां रे खिलाफ कार्रवाई करण सारू नुवो मसौदो बणायी ज्यो हैं

000

राज्यपाल हरिभाऊ बागड़े विश्व दिव्यांग दिवस रे मौके सगळा ऊँ दिव्यांगजन रा भला सारू समर्पित व्हे र काम करण बाबत् कह्यो हैं श्री बागड़े आज न्यारा-न्यारा संगठनां री ओर ऊँ राख्यी ज्या कार्यक्रमों मांय शामिल व्ह्यां वे कह्यो के दिव्यांगजन दिव्य अर जीवन शक्ति ऊँ भरपूर व्हे हैं राज्यपाल दिव्यांगजन ऊँ मन अर दिमाग ने तंदुरुस्त राखता थकां आगे बधबा सारू कह्यो इण ऊँ पैली श्री बागड़े 'विश्व दिव्यांग सम्मान' रा तैत चुणी ज्या बच्चां समेत केई दिव्यांग जन रो मान कीनीं वे बच्चां री प्रतिभा ने आगे लावण अर 'दिव्यांगजन अधिकार विधेयक -2016' रा प्रावधानां ने लागू करण माथे जोर दीनीं

000

केंद्रीय संस्कृति और पर्यटन मंत्री गजेन्द्र सिंह शेखावत कह्यो है के देश मांय लारला दस साल मांय 1 लाख 15 हजार किलोमीटर ऊँ बत्ता लम्बा नुवा हाई-वे बणायी ज्या है, ज्यां रो सीधो फायदो सैलाणियां ने मिलेलां वे आज कारोबारी संगठन सीआईआई रा सम्मेलन मांय बोल रह्या हां शेखावत कह्यो के सरकार हॉस्पिटैलिटी इंफ्रास्ट्रक्चर ने 'इंफ्रास्ट्रक्चर स्टेटस' दीनीं हैं वे सैर-सपाटा ने विकसित भारत 2047 री यात्रा रो खास ग्रोथ इंजन बतायो

000

अंतर्राष्ट्रीय दिव्यांगजन दिवस रे मौके आज राज्य स्तर रो जळसो जयपुर मांय राख्यी ज्यो जळसा मांय मुख्यमंत्री भजनलाल शर्मा ई शामिल व्ह्यां वे कह्यो के दिव्यांगजन समाज री अनमोल निधि है अर दिव्यांगजन मांय जबरदस्त इच्छा शक्ति अर विशेष योग्यता व्हे है, जिण रो फायदो सरकार ने मिलणो चाहिजे मुख्यमंत्री जनता ऊँ दिव्यांगजन री प्रतिभा ने पिछाण र वां ने बधावो देवण बाबत् कह्यो श्री

शर्मा कह्यो केसरकार दिव्यांग भाई-बहनां सारू क्लस्टर बणाया है, ज्यां रे मार्फत अहलकार हर तीन महीना मांय वां सागे मुलाकात कर र वां री परेशानियां री जाणकारी लेवेलं

000

पंजाब रा राज्यपाल गुलाबचंद कटारिया कह्यो है के भारत रा रहवासी ई वोट देवण रा हकदार व्हेवणा चाहिजें वे आज भीलवाड़ा मांय राख्यी ज्या एक कार्यक्रम मांय बोल रह्या हां

ई बीचे बाँसवाड़ा जिला मांय एसआईआर रो काम 100 फीसदी पूरो व्हेवण परां जिला कलेक्टर डॉ. इंद्रजीत सिंह वां री टीम री सराहवणा कीनीं ई उपलब्धि सारू कलेक्टर रो मान करी ज्यो हो पाली री नौजवान मतदाता लहर एसआईआर फॉर्म भरण सारू नौजवाना ने प्रेरित करता थकां इण ने निर्वाचन आयोग री चोखी पहल बतायी

000

भारतीय अंतरिक्ष अनुसंधान संगठन-इसरो कानी ऊँ कोटा मांय लगायी ज्यी 'विक्रम साराभाई अंतरिक्ष प्रदर्शनी' आज पूरी व्हे गयीं प्रदर्शनी मांय चंद्रयान, मंगलयान, रॉकेट सिस्टम, उपग्रह अर रोवर रा मॉडल रो ई दरसाव करी ज्यों तीन दिन तांई चाली ई प्रदर्शनी रो मकसद विद्यार्थियां ने भारत री अंतरिक्ष उपलब्धियां अर वैज्ञानिक अनुसंधान रा न्यारा-न्यारा कामां री जाणकारी देवणो हां ई दौरान विद्यार्थी इसरो रा वैज्ञानिकां सागे सीधी बातचीत कर र न्यारी-न्यारी जिज्ञासा शांत कीनीं

000

जयपुर मांय भारतीय जनता पार्टी रा प्रदेश दफ्तर मांय आज चिकित्सा मंत्री गजेन्द्र सिंह खींवर अर राज्य मंत्री मंजू बाघमार कार्यकर्तावां रा 100 ऊँ बत्ता मामलां री सुणवाई कीनीं ई मौके खींवर कह्यो के भाजपा रा दफ्तर मांय कार्यकर्तावां री सुणवाई री व्यवस्था सरकार रो सकारात्मक कदम हैं वे बतायो के मंत्रियां रा रहवास माथे सोमवार ऊँ बुधवार तांई संवारे 9 ऊँ 11 बज्यां तांई जन सुणवाई ई चालती रहवेलं राज्य मंत्री मंजू बाघमार कह्यो के आ व्यवस्था सरकार री साफ मंशा रो दरसाव करे हैं आवता सप्ताह 8 दिसंबर, ने उपमुख्यमंत्री दीया कुमारी अर यूडीएच मंत्री झाबर सिंह खर्वा रो प्रदेश भाजपा रा दफ्तर मांय कार्यकर्ता सुणवाई रो कार्यक्रम हैं

000

राज्य रा पेंशन लेवण वाळा अर पारिवारिक पेंशन लेवण वाळां सारू जिन्दा व्हेवण रो सर्टिफिकेट पेश करण री आखिरी तारीख बधा र 20 दिसंबर कर दीरीजी हैं पेंशन अर पेंशनर्स कल्याण विभाग रा निदेशक महेंद्र सिंह भूकर बतायो के अब पेंशन लेवण वाळा आईएफएमएस 3.0 रे मार्फत एसएसओ आईडी रे जरिये जीवित प्रमाण पत्र आसानी ऊँ बणवा सके हैं ई सागे ई संबंधित ट्रेजरी या संभागीय पेंशन कार्यालय मांय पेश व्हे ई जीवित प्रमाण-पत्र बणायो जा सके हैं

000

प्रदेश मांय बिरखा रो पाणी बचावण सारू 25 हजार फार्म पौंड अर 10 हजार डिगियां बणायी जावेलं कृषि अर उद्यानिकी मंत्री डॉ. किरोड़ी लाल मीणा आ जाणकारी दीनीं वे बतायो के सिंचित क्षेत्र अर किसानां री आमदनी मांय बधोतरी रा मकसद ऊँ 50 हजार स्थायी वर्मीकम्पोस्ट इकाइयां ई बणायी जावेलं

000

सलूंबर जिला मांय सिंयाळू साखां री पाणत सारू जयसमंद झील री जीमणी नहर मांय आज पाणी छोड़ी ज्यों जल संसाधन विभाग रे मुजब ई नहर ऊँ वीरपुरा, गातोड़, खाखल, महुड़ी, श्यामपुरा अर चंदाजी का गुढ़ा समेत केई गांवां मांय पाणत सारू पाणी मिल सकेलां पाणी छोड़बा ऊँ पैली वठे रीत मुजब पूजा-अर्चना करी ज्यीं

000